

# *GOMME MAHLO A BONA A BULEGA GOMME BA MO TSEBA*

♪ Ka go Ebangedi ya Mokgethwa Luka, gomme go thoma ka temanaya 24 le masometharo-... temanaya 31, goba ke tla re temanaya 30 ya tema ya 24.

*Gomme go tlide gwa phethega, ge a dutše dijong le bona, gomme o tšere borotho, gomme a bo šegofatša, gomme a bo ngwatha, gomme a ba fa.*

*Gomme mahlo a bona a bulega, gomme ba mo tseba; gomme a timelela go tloga mahlong a bona.*

*Gomme ba botšana seng sa bona, A dipelo tša renaga tša swa ka gare ga rena, mola a bolela le rena mo, tseleng, gomme mola a re bulela mangwalo?*

<sup>2</sup> Gomme anke Morena a oketše tšegofatšo ya Gagwe. Sehlogo sa ka e tla ba, ge nka se bitša bošegong bjo: *Gomme Mahlo A Bona A Bulega Gomme Ba Mo Tseba*. Bjale go a fiša, eupša ke a duma le ka swarelela ka kgotlelelo ka mo le ka kgonago, feela dinakwana di se kae, gomme ke tla leka go hlaganelia. Eupša bjale re nyaka go lebelela ka potego go Lentšu, Lentšu la Modimo la go makatša. Gomme re a rapela gore Modimo, ka tsela ye nngwe, o tla bula mahlo a rena bošegong bjo.

<sup>3</sup> Ge Paseka e no ba moketeko wa tiragalo ya histori, gomme yeo e nnoši, gona re ne lebaka le lennyane go belaela, re ne lebaka le lennyane go botšiša, gobane e tla tlogelwa godimo ga kgopoloya potego ya go no tsea lentšu. Gomme ge Kriste a be a se a dira ditshepišo tše A di dirilego, gona le rena re be re tla, go no se be le bohlatsa bjo re nago nabjo.

<sup>4</sup> Eupša Morena wa rena mošegofatšwa o rile, mola A sa le mo lefaseng, “Lebakana le lennyane, gomme lefase le ka se sa Mpona gape.” Bjale lentšu lela *lefase* kua, le tšwa go “tshepedišo ya lefase, batho ba lefase.” “Lefase le ka se sa Mpona gape. Efela le tla Mpona, gobane Ke tla ba le lena, ebile le ka go lena, go fihla bofelong bja lefase.” Bjale, Mantšu ao a no ba therešo bjalo ka e ka ba afe Mantšu a mangwe re a boletšego beke ye, go tšwa go Beibele, a no ba therešo bjalo ka Mantšu a mangwe le a mangwe a Beibele. “Lebakana le lennyane, gomme lefase ga le sa Mpona gape. Ba ka se tsoge ba ba le mahlo a bona a bulegile.” Go ne batho ba ba tswetšwego ka lefaseng, e sego ka thato ya Modimo, eupša ka kgetho ya bona beng ya boikholanoši ba be ba ka se Mo dumele ge A be a eme thwi mo a bolela le lena bošegong bjo. Go a nyamiša go bolela, eupša Beibele e boletše gore, “Ba tswetšwe lefaseng le, go kahlolo ye,” Jude, gomme e ka ba temanaya 3.

<sup>5</sup> Bjale, eupša go lena, bošegong bjo, ba le tlogo ntle le go ema tikologong ka kamoreng, le go katedana mmogo ka go moago wo monnyane wa go fiša ka mokgwa wo, ga se la tsoge la tla go no bonwa. Le tletše morero. Gomme, go kgopolu ya ka, le tlie ka tlhokofalo ya pelo ya lena, bakeng sa go sepela kgauswiuswi le Modimo, go tloga mo, bošegong bjo, motho yo mokaone go feta ka mo o bego o le ge o etla ka gare. Seo ke se ke se rapeletšego ge ke be ke tsena ka mojako, bošegong bjo, “Morena, ntire motho yo mokaone ge ke tšwela ntle, bošegong bjo, go feta ke le ge ke eya ka gare.” Bjale ge A . . .

<sup>6</sup> Pele ga go tloga ga Gagwe, O dirile mohuta wo wa ditatamente. O rile, “Yo a dumelago go Nna . . .” Mokgethwa Johane, tema ya 14, temana ya 7. “Yo a dumelago go Nna, mediro ye Ke e dirago o tla e dira le yena; ya go feta ye o tla e dira, gobane Ke ya go Tate wa Ka. Ke a tloga, le go bowa gape.”

<sup>7</sup> Bjale re hwetša mediro ye A e dirilego. Mediro ye A e dirilego? Ga se A ke a teleima go ba motho yo mogolo, O be a no ba Monna wa go kokobela. O be a sa bolele ka tlotlontšu e ka ba efe ya godimo, O be a no bolela bjalo ka Monna wa mehleng. O phetše magareng ga bahloki, “diphukubje di bile le melete, gomme dinonyana di bile le dihlaga, eupša O be a se ne lefelo go latša hlogo ya Gagwe.” O be a ne seaparo se tee, se se bego se filwe Yena, “se be se logilwe go tšwelelela, se se ne moroko ka go sona.”

<sup>8</sup> Ke ka tsela yeo ba se kempoletšego. Gobaneng go bile seo? Gobane seprofeto sa Testamente ya Kgale se be se swanetše go phathagatšwa, “Ba arogane diaparo tša Ka, ba foša matengwa bakeng sa kobo ya Ka.” Kafao ga se ba kgona go e aroganya ka moroko, ba ile ba swanela go e kempolela, gomme seo e be e le go phathagatša seprofeto sa Testamente ya Kgale.

<sup>9</sup> Eupša re tla lemoga, dinakwaneng di se kae feela, O dirile eng? Gomme ke a dumela, bošegong bjo, ke tlala ya ye nngwe le ye nngwe ya dipelo tša rena, go tloga go yo monyenyan go fihla go motšofetšofe, bošegong bjo, go bona Jesu Kriste. Ke tlhologelo ya pelo ya ka. Gomme gobaneng e le? Ge re teleima ka Mangwalo . . .

<sup>10</sup> Diyalemoya di a ithuthupiša lehono, dithelebišene di bea mananeo, diterama di boletše, gore, “Yena ga a mo, eupša O tsogile!”

<sup>11</sup> Gabotse, gona, ge A tsogile, Beibele e boletše, ka go Behebere 13:8, “O a swana maabane, lehono, le go ya go ile.” Bjale, šefa mo e lego, magagešo. Eba gore ke Therešo, goba ga se Therešo. Gore, ge eba ga se Therešo, gona Beibele ke maaka, gomme gona Mantšu ke maaka; gomme gona re lahlegile, gomme ga go tsogo ya bahu, gona re no itiriša go dumela. Eupša ge e le Therešo, gona E swanetše go itlhatsatša Yonamong.

<sup>12</sup> Ge o re meetse a a monola; ga se nke ka tsoge ka bona meetse pele. Wa a tšhela godimo ga ka, gomme ga a monola, gona matšu a gago—a gago ga se therešo. Eupša ge o a tšhela godimo ga ka, gomme a ba monola, gona mantšu a gago ke therešo.

<sup>13</sup> Ge Kriste a swana maabane, lehono, le go ya go ile, gona Beibebe ke Therešo. Ge A sa swane maabane, lehono, le go ya go ile, gona ga se Yona therešo. Ge Mantšu a Modimo e se therešo, gona Kriste ga se therešo. Gona, ge Mantšu a Modimo e se therešo, Modimo ga se therešo. Eupša, gona, ge Lentšu la Modimo e le therešo, gona Beibebe ke therešo, Modimo ke therešo, Kriste, ke therešo, gona re swanetše go ba therešo go Taba. Therešo!

<sup>14</sup> Bjale, ge A be a le lefaseng, ga se A ke a tteleima go ba mofodiši e ka ba ofe yo mogolo. Ke ba bakae ba tsebago Morwa wa Modimo ga se a ke a tsoge a tteleima go ba mofodiši? [Phuthego e re, "Amene." —Mor.] Nnete tlwa. O rile, "Nna ga ke kgone go dira selo ka Bonnamong, eupša se Ke bonago Tate a se dira. Ga se Nna ke dirago mošomo," O rile, "ke Tate yo a dulago ka go Nna. O dira mešomo." O dirile mešomo ya mohuta mang?

<sup>15</sup> Re hwetša ka Beibeleng, moo moisa wa leina le Filipi a phološitšwego. Gomme o ile godimo le go hwetša mogwera, Nathanaele; moragorago, dimaele tše masometharo go dikologa thaba. O mo tlišitše morago go Jesu. Gomme ge a mo hwetša, o be a le ka tlase ga mohlare, a rapela. Gomme o rile, "Etla, o bone Yo re mo hweditšego; Jesu wa Natsaretha, morwa wa Josefa."

O rile, "A go ka ba selo e ka ba sefe se sebotse go tšwa Natsaretha?"

O rile, "Etla gomme o bone."

<sup>16</sup> Bjoo ke bohlatse bjo bokaonekaone ke bo tsebago. O se ke wa tšea lentšu la yo mongwe gape bakeng sa Lona. Etla, bona wenamong! A re, "Etla gomme o bone."

<sup>17</sup> Gomme ge a etla, Jesu o be a eme ka mothalong, mohlomongwe a rapelela batho. Gomme ge Filipi a etla godimo, le Nathanaele, Jesu o rile, "Bonang Moisraele, ka go yena ga go bomenetša!"

<sup>18</sup> O rile, "O ntsebile neng, Rabi?" E mo makaditše. "O ntsebile neng?"

<sup>19</sup> O rile, "Pele Filipi a go bitša, ge o be o le ka tlase ga mohlare, Ke go bone." Dimaele tše masometharo kgole, go kgabola thaba, efela, "Ke go bone."

<sup>20</sup> Seo se laeditše O be a le Mang. O be a le Modimo motlalagohle; e sego feela moprefeta, eupša Modimo Yenamong a bonagaditšwe ka nameng. Ké ka baka leo A kgonnego go bo bea, bophelo bja Gagwe, fase, a bo tšea gape.

<sup>21</sup> Mosadi yo monnyane o tlide ntle go ga meetse letšatši le lengwe. Gomme o boletše le yena, gomme o rile, "Mosadi, Ntlišetše seno!"

<sup>22</sup> O rile, "Ga se setlwaedi go lena Bajuda go kgopela rena, Basamaria, se sebjalo. Ga re ne dikwano le seng sa rena."

<sup>23</sup> O rile, "Eupša ge o ka be o tsebile Yo o bego o bolela le yena, o be o tla Nkgopela seno. Ke be ke tla go tlišetša Meetse o ka se tlego mo go ga."

<sup>24</sup> Gomme o rile, "Sediba se a sobeletša, Mohlomphegi. Ga o ne sa go ga, gomme O tla hwetša kae Meetse a."

<sup>25</sup> O be A dira eng? A kgokagana le moyo wa gagwe. Gomme ge A hweditše se bothata bja gagwe bo bego bo le sona, bothata bja gagwe e be e le gore o be a phela ka bootsweng. O be a bile le bannabagatša ba bahlano, gomme o be a dula le wa gagwe wa boselela.

Gomme Jesu o rile go Yena, "Eya, tšea monnamogatša wa gago, gomme le tle mo."

Gomme o rile, "Ga ke ne le ge e ka ba monnamogatša."

<sup>26</sup> O rile, "Aowa, o bile le ba bahlano, gomme yo o phelago le yena bjale ga se wa gago. Kafao, o boletše gabotse."

<sup>27</sup> Lebelelang bjale, Mojuda. Ge Jesu a dirile mohlolo wola go yena, Mojuda yola wa kgonthe wa mmakgomatha, wa kgonthe, Mojuda wa therešo, o rile, "Wena o Morwa wa Modimo, Kgoši ya Israele." O tsebile gore wona maswao a be a swanetše go fegeletša Mesia.

<sup>28</sup> Gomme bjale Mosamaria šo. Ge mohlolo wola o dirilwe go yena, o rile, "Mohlomphegi, ke a bona gore O Moprefeta. Re a tseba gore ge Mesia a etla, O tla re botša dilo tšohle tše. Eupša Wena o Mang?"

O rile, "Ke nna Yena yoo a boleLAGO le wena."

<sup>29</sup> O tlogetše pitša ya gagwe ya meetse, gomme a kitimela ka toropongkgolo, le go re, "Etlang, bonang Monna Yo a mpoditšego dilo tše ke di dirilego. A yo ga se yena Mesia?" Nnete.

<sup>30</sup> Go ya pele go kgabola Mangwalo re ka kgona go e tše, kafao gore O dirile dilo tše Tate a Mmontšhitšego. Beibele e boletše, godimo ka go Mokgethwa Johane, ge ba Mmotšišitše ka gore gobaneng A be a sa fodiše batho bohole bale ba digole, gomme O rile, "Ruri, ruri, Ke re go lena." Mokgethwa Johane 5:19, "Ruri, ruri, ke re go lena, Morwa ga a kgone go dira selo ka Boyena; eupša se A bonago Tate a se dira, Morwa o dira ka mokgwa woo."

<sup>31</sup> Bjale, ge Kriste a tsogile go tšwa bahung, gomme a le gona magareng ga rena lehono; gomme a tshepišitše gore dilo tša go swana tše A di dirilego, gore re tla di dira le rena; yeo e ba gore ke Therešo, goba ga se Therešo. Beibele e rile, "O a swana maabane, lehono, le go ya go ile."

<sup>32</sup> Gomme, bagwera, ke nno thabela go tseba, lehono, gore ka therešo ke, le ka tšohle tše di lego ka go nna, ke a dumela gore Jesu Kriste ke Morwa wa Modimo. O imilwe le go tswalwa, tswalo

ye botsebotse. O tlaišegile ka tlase ga Ponto Pilato; a bapolwa, a hwa, a bolokwa, a tsoga gape letšatsing la boraro; le go rotogela ka Legodimong, gomme o dutše ka seatleng se setona sa Bogoši bja Gagwe. Gomme Moya wo Mokgethwa o mo go tšwetšapele modiro wa go swana wo A o dirilego ge A be a le mo lefaseng. A kgopolو ye botse!

<sup>33</sup> A moso wo mobotse, moso wa pele wa tsogo, Paseka ya mathomo e kilego ya tšwelela lefaseng! A le a lemoga gore Paseka ye re e ketekago, ya tsogo ya Gagwe, e šupa feela go Paseka ye kgolo ye e tlago, iri ye A tlago go tšwa Magodimong? Gomme bohole ba ba hwetšego go Kriste ba tla tsoga le go ya le Yena. Re lebeletše feela pele go yeo, Paseka ye kgolo, e tlago. Gomme, lehono, ke mo gobotse bjang, a khomotšo, a netefatšo ye re nago nayo, ge Beibele e e bega, ge botlalagohle bja Gagwe bo e bega, ge Maatla a phodišo a Gagwe a e bega, ge Moya wa Gagwe wo mogolo o e bega, ge se sengwe le se sengwe ka go tlhago se e bega, Kereke ya Gagwe e a e bega, pelo ya ka e a e bega, pelo ya motho yo mongwe le yo mongwe a tswetšwego gape e a e bega, gore, “Jesu Kriste ke Morwa wa Modimo, gomme o tla tla gape! Gomme O swana bjale, ‘Maabane, lehono, le go ya go ile!’” Bjale hlokomelang.

<sup>34</sup> E bile mosong wo mobotse wo wa Paseka. Go bile mabarebare a mantši, polelo. Basadi ba bangwe ba tlie morago go tšwa lebitleng, gomme ba rile ba bone pono ya Barongwa. Gomme ba tšere go ba raserapana; Maria, mme, gobane o kwele segalontšu se bolela ka morago ga gagwe, gomme se rile, “Le nyaka Mang?” Gomme ge A retologile . . .

<sup>35</sup> O retologile, gomme a re, “Ba tšere Morena wa ka. Ga ke tsebe mo ba Mo robaditšego. Ge O tseba, mpotše mo A lego, gomme ke tla ya ka Mo tšeaa.”

O retologile, gomme a re, “Maria.”

<sup>36</sup> Gomme a Mo lebelela, gomme o rile, “Rabboni,” ye e rago, “Mong!”

<sup>37</sup> O rile, “O se ke wa Nkgwatha, gobane Nna ga se ka tšwa ke rotoga. Eupša Ke tla rotogela go Tatago lena, le go Tate wa Ka; go Modimo wa Ka, le go Modimo wa lena. Eupša eya, botša barutiwa ba Ka Ke tla kopana le bona ka Galelia.”

<sup>38</sup> Kafao go bonagetše e le taba ya go tsekella, ya Monna yo ba mmonego a manegwa; gomme a hwile, a bolokilwe, gomme le e be e le letšatši la bone, goba letšatši la boraro ge e sa le A hwile. Petro o be a ngenegile, gomme a nyaka go ya go rea dihlapi. Ba babedi ba bona ba rile, yo motee ka leina la Kleopa, o rile, “Re tla no ya morago gae, Jerusalema.” Gomme tseleng ya bona, ba sepela go bapa, mosong woo. Ge Petro a tšere lešika la gagwe la dihlapi gomme a tloga, go ya go thea. Ba babedi ba ba be ba le tseleng ya bona, ba nyamile. Gomme ge ba be ba eya go bapa tseleng, ba re, “Gabotse, ke a thankā bophelo ga bja swanela

go phelwa. Oo, ka moo re bego re dumela gore O be a le Mesia! Monna yola a ka kgona bjang, Yo a tsošitšego bahu, a ka tsoge a ema le go tlogela moprista yola yo mogolo a dira metlae ka Yena? Monna yola a ka kgona bjang, Yo a kgonnego go bona pono, ka morago ga pono a tsoge a tlogela lešole la Moroma go bea lešela go rarela sefahlego sa Gagwe, le go Mo ita hlogong, le go re, ‘Ge O le moprofeta, re botše ke mang a Go iteilego?’ Go tlile bjang gore A goelele bakeng sa kgaogelo, godimo ga sefapano, go boneng gore O be ebile a kgona go tsoša bahu?” Oo, e be e le nakwana ya go ngenega!

<sup>39</sup> Gomme dinako tšeō tša go ngenega di tla go modumedi yo mongwe le yo mongwe, go go leka, le go go leka, le go bona ge o dumela ka kgonthe. “Morwa yo mongwe le yo mongwe yo a tlago go Modimo, o swanetše go lekwa pele, go hlahlala ngwana.”

<sup>40</sup> Go tla ba ba bangwe ba lena mo bošegong bjo, ntle le pelaelo, ba tla ya go kgabola moleko wa go swana. Ge re tla bitša mothalo wa thapelo, ga ke ne kakanyo ke bomang ba nago le dikarato tša thapelo, ga go yo mongwe gape a tsebago; di no hlakanywa tšohle mmogo, le go neelwa go lena. Ke tla bitša go tšwa felotsoko, kae kapa kae go lego monaganong wa ka ka nako yeo. Re ka se kgone go ema eupša ba sego nene ka nako. Ditasene tše mmalwa, mohlomongwe, ba tla feta godimo go mothalo wa thapelo. Bohle ba nyaka go tla. O ka no nagana gore O go fetile ka thoko, eupša ga se A dira. O no go leka, go no bona ge ka kgonthe o tla Mo dumela. Pono ga e fodiše; pono e hlatsela feela Bogona bja Gagwe.

<sup>41</sup> Ke be ke nno dula mo, ke lebeletše feela go kgabaganya batheeletši. Gomme ke bona mo—mo mogwera wa ka, Mdi. Cox, go tšwa tlase ka Kentucky. O bile le kankere ye kgolo godimo ga sefahlego sa gagwe, dibeke di se kae tša go feta, e be e jele ntle go dikologa leihlo la gagwe. O be a ehwa. Mdi. Wood, mogwera wa ka wa go loka, o nteleditše mogala, gomme o be a lla, o rile, “Ke a dumela e ya go ja leihlo la mme ntle, mo matšatšing a se makae.” Ngaka o tshwenyane le yona, ka mohuta wa selo tsoko, gomme o e phatlaladitše. E be e le ka go seemo sa go šiiša. Ke ile ka gare le go neela ye bonolo, thapelo ye nnyane, ka tumelo ya go kgwaparetša, gore e be e tla direga. Gomme šo o dutše mo bošegong bjo, o sekeng go phethagala le go fola; ebile ga go le sepatso sa yona se e se tlogetšego, e fodile yohle, godimo ga sefahlego sa gagwe. O dutše thwi mo ka pele ga rena. Ba bangwe tikologong, ka selo sa go swana. Gobaneng? Ke ka gobane Jesu Kriste o tsogile go tšwa bahung, gomme O a phela.

<sup>42</sup> Wa go swana Yo a kgonnego go kgwatha molephera, le go re, “Ke a rata, wena hlweka,” a ka kgona go kgwatha kankere le go re, “Ke a rata, wena hlweka,” ge A swana maabane, lehono, le go ya go ile.

<sup>43</sup> Gomme ge Kleopa le bona ba be ba sepela mmogo, ba ngenegile, ba be ba le mohuta wa go ba ka go wo mongwe wa meso yela ya go nyama, go bonala o ka re selo se sengwe le se sengwe se ya ka go fošagala. Gomme gohle ka pelapela, Mongwe o gatetše ntle, ge A e tla ka morago ga bona, a sepelela godimo gomme a hlakana le bona. Gomme bonnyane ba be ba sa tsebe gore yoo e be e le Morena Jesu! O be a phela, gomme batho ba bantši ba bego ba Mo rata ba be ba sa e tsebe.

<sup>44</sup> Gomme seo ke selo sa go swana bjalo ka ge go le lehono. Go ne batho ba bantši lehono ba ba ratago Morena, gomme ga ba lemoge. O ka ba botša ka yona, gomme efela ba ka se kgone go lemoga gore O phela go ya go ile, bošegong bjo, gore O mo ka go kereke ye bošegong bjo, gore O magareng ga rena, gomme o tla ba go fihla A etla ka wa sebele, mmele wa nama. “Nka se tsoge ka le tlogela goba go le hlokologa.”

<sup>45</sup> Gomme ge ba be ba eya mmogo, le go thoma go bolela, go bapa tseleng. Jesu, ke nyaka le hlokomele selo sa pele Jesu a se dirilego, o ile thwi go otlologa go Lengwalo. O rile, “Oo, mašilo a pelo, a go bothata go lena go dumela se baprofeta ba se boletšego?” Ka gore, O be a sa tšo ba botšiša, “Gobaneng le nyamile bjalo?”

<sup>46</sup> Gomme ba rile, “A O mosetsebje? A ga O tsebe gore Jesu wa Natsaretha, Yo re bego re nagana gore ke Mesia, Molokolodi wa Israele, a ga o tsebe gore le eibile ke letšatši la boraro ge A bapotšwe? O be a le monna yo maatla, ka Lentšu. O be a le moprofeta yo maatla, gobane ke mehlolo ye mentš le dilo, Modimo a di dirilego ka Yena. Gomme le ke letšatši la boraro; gomme bjale ba Mmolaile, le go Mmolaka, gomme O be a le ka lebitleng. Gomme basadi ba bangwe ba tlide go rena le go re botša gore O tsogile go tšwa bahung. Gomme re tsebile e no ba taba ya bošilo, kafao re tseleng ya rena go ya morago.”

<sup>47</sup> Nako ye ke ge A thoma go bula Lentšu. Oo, ke rata Lentšu la Modimo la Gosafelego! O thomile go ya go kgabola Mangwalo, a thoma ka Moshe. Ga se A tlogela le ge e ka ba eng e se ya bulwa, O ile thwi go Lentšu!

<sup>48</sup> Monna morongwa ke Modimo mang kapa mang, ga ke tshwenyege ke mang, o tla dula le Lentšu la Modimo. Ge a sa dire, ga se mohlanka wa therešo wa Modimo.

<sup>49</sup> O ile thwi go Lentšu. Gomme O laeditše, ka Lentšu, gore Kriste o be a swanetše go hwa, go tsoga gape, le go tsena ka Letagong la Gagwe. Bjale, oo, ka mokgwa wo ba swanetšego go be ba be ba bolela!

<sup>50</sup> Ke be nka rata go be ke bile le polelo ye nnyane yela ya diiri di se kae le Yena (a o be o ka se ke?) go bapa tseleng. O re, “Gabotse, Ngwanešu Branham, ka mnete ke be nka. Ke duma ge nkabe ke dirile.” Gabotse, re ka ba le yona bjale. Yoo ke Yena a bolelagoo le wena, ka pelong ya gago. O no se e lemoge.

<sup>51</sup> Bjale hlokomelang ge A batamela kgauswi le toropokgolo, mantšiboa a be a etla, O dirile se o ka rego O be a eya go feta.

<sup>52</sup> A ka no dira seo go wena, le wena. A ka no go dira o nagane gore O ya go feta, eupša A ka se ke. A ka se fete. O no nyaka o Mo laletše.

<sup>53</sup> Gomme ba rile go Yena, “Oo, letšatši le fedile. Bjale o se ke wa ya pele, eupša hle tsena ka gare gomme o dule le rena.” O no Mo fa mohuta woo wa taletšo, hwetša se se tla diregago. Ba rile, “Letšatši le fedile bjale, Wena etla o dule le rena. Ke go leba mantšiboa.” Ka gona O retologile le go tsena ka gare, ka go restoranta ye nnyane, hotelana ye nnyane.

Ka Yuropa ba sa na le yona. O a ja le go robala, gomme se sengwe le se sengwe se lefelwa ka go mokitlana o tee, hotela ya gago.

<sup>54</sup> Gomme ge A fihla ka gare le bona! Karolo ye botse še. Letšatši leo lohle, ge ba be ba bolela le Yena, ga se A tsoge a bolela selo setee. Efela, ba sepetše le Yena le go bolela le Yena, pele, eupša ga se ba ke ba e lemoga.

<sup>55</sup> Ke mang a go bolokilego go se be le kotsi yela letšatši le lengwe? Ke mang a dirilego lesea lela go fola? Ke mang a go lefetšego mokitlana wa krosari? E be e le Yena, eupša o no se e lemoge. Ke mang a go fago go phelega go tla ntle kerekeng bošegong bjo? Ke Yena, eupša ga o e lemoge. Oo, ge feela re ka no dira bjalo ka bona, go no Mo laletša go tla ka gare!

<sup>56</sup> Gomme ge A tlile ka gare, o tsene ka gare, ba tswalela mabati, nako yeo O dirile se sengwe se go sego motho a ka se dirago ka tsela yeo. E be e le Yena a nnoši a ka kgonago go se dira, gobane ba bile le Yena pele ga papolo ya Gagwe. Gomme O tšere borotho bjola, gomme, feela ka tsela ye A bo dirilego, yeo e be e le tsela ya Gagwe Mong ya go bo dira. Gomme mahlo a bona a bulega, gomme ba tsebile yoo e ka kgonago go ba Yena a nnoši. Ga se A dula le bona botelele e ka ba bofe. [Ngwanešu Branham o thwantšha monwana wa gagwe—Mor.] O timeletše mahlong a bona, feela ka nakwana.

<sup>57</sup> Gomme mo tseleng ya bona, ba boetše morago feela ka thata ka mo ba bego ba kgonago go ya, maoto a bohwefo, ba no goeletša phenyo, go ba botša gore, “Morena o tsogile ka nnete!” Ga ba ya morago go ngangišana bodumedi bja bona. Ga se ba ya morago go baka ka Bjona. Eupša ba nno tseba O tsogile go tšwa bahung!

<sup>58</sup> Bjale, mogwera, ge Jesu Kriste, Morwa wa Modimo wa go phela, ka morago ga mengwaga ye makgolo a lesomesenyane ya go feta; ge Beibebe e le therešo, O rile, “Ke a phela go ya go ile”; O sa no phela mo, ka moagong wo bošegong bjo, bjalo ka ge A be a le letšatši la tsogo ya Gagwe. O no ba ka mmeleng.

<sup>59</sup> Ba bangwe ba bona ba be ba kgobokane mmogo. Gomme A tla thwi go kgabola maboto, a tšwelela thwi ka gare, go kgabola

bogare bja bona, a re, “Mo, Mphopholeng. Lebelelang mabadi a Ka ka diatleng tša Ka. A moya o ne nama le marapo boka Ke natšo?” O rile, “Mpheng se sengwe go ja.” Gomme ba Mo fa hlapi le borotho. Gomme O eme kua le go bo ja, pele ga bona, a re, “Moya ga o je boka le Mpona ke ejá.”

<sup>60</sup> Yena ke eng? Yena ke yo mogolo yola, Jehofa Modimo wa go phela yo a lego magareng ga rena bošegong bjo. O magareng ga kae kapa kae ba babedi goba ba bararo ba kgobokanego: “Ke tla ba magareng ga bona.”

<sup>61</sup> Gomme bjale sese se ke se naganago. Ge Kriste a ka tla go batheeletsi ba ba batho, ge le sa tšwa mphufutšo, le letile; gomme a netefatša, mo Pasekeng ye, gore O a phela, le go ema ka moagong wo bošegong bjo; gona le na le tokelo ya go Mo kgopela eng kapa eng A e hwetšego, gomme dumelang gore le tla e amogela. A le dumela seo go ba Therešo? [Phuthego e re, “Amene.”—Mor.] Nnete, ke yona.

<sup>62</sup> Bjale, nka kgona go bolela le lena botelele, eupša Lentšu le tee go tšwa go Kriste le tla bolela bontši go feta mantšu ohle nka a bolelago; go lapa le ngangego ka go segalontšu, le go lapa bjalo ka ge go le ka go segalontšu.

<sup>63</sup> Gomme ka gona selo se sengwe, ka go bolela. Go thata, gobane le ke legae la ka, go ba le kopano ya katlego ka tlotšo ya Moya boka yeo. Gobaneng? Gobane le ke legae la ka. Jesu o boletše gore, “Mopropeta, ka legaeng la gagwe mong, naga ya gabon mong, ebile ka go selete sa gabon mong.” E no ba se sengwe se se diregago ka tsela yeo.

<sup>64</sup> Ba boletše gore ge A ile legaeng la Gagwe Mong, ba rile, “A yo ga se morwa wa mmetli? A mme wa Gagwe, ga se Maria, mo le rena? A bana Babo bohle ga ba mo, le dikgaetšedi tša Gagwe? A ga re ba tsebe? O tšwa sekolong sefe? O alogile seminareng efe? O rwele ditshwanelego dife?” Gomme O be a sa tšwe go kgabola sekolo e ka ba sefe goba seminari e ka ba efe, goba ditshwanelego e ka ba dife, eupša O tšwa go Modimo. Eupša ga se ba kgona go e bona. Ba rile, “O tšea kae bohlale bjo?”

<sup>65</sup> Gomme ge ba Mmone a hlatha dikgopololo tšela tša batho. Ge Petro a etla godimo go Yena, O rile, “Leina la gago o Simone. Leina la papago ke Jona.”

E ba rapaladitše! “O ba tsebile bjang?”

<sup>66</sup> Bafarasei ba eme kgauswi, gomme ba rile, “Ke Yena Beletsebubu. Ke Yena kgoši ya babolelelamahlatse. Yena ke diabolo!”

<sup>67</sup> Gomme Jesu o rile, “Le bolela seo kgahleng le Nna, Morwa wa motho, le tla e lebalelwaa. Eupša ge Moya wo Mokgethwa o ttile le go dira selo sa go swana, gomme la bolela lentšu le tee kgahleng le Wona, e ka se tsoge ya lebalelwaa lena, ka go lefase le goba lefase le le tlago.” Kafao, ke selo sa kotsi. Kafao O tsebile

bjang? Gobaneng A ile a bolela seo? O tsebile gore wona maswao a tla goma go fihla letšatši le la mafelelo.

<sup>68</sup> Gomme matšatši a a mafelelo, A ka se be moloki, go tšollela bogale bja Gagwe godimo ga batho ba go loka. Ba ba le... Re kadilwe godimo ga sekala, gomme ra hwetšwa re hlaelelwa. Tšohle re naganago ka tšona ke dinako tše dikgolo, mananeo a seyalemoya, a go se hlokolwe, Elvis Presley, Arthur Godfrey, metlae ya kgale ya ditšhila, dielwahloko tša seyalemoya le thelebišene. Re dula gae ka Laboraro bošego, go tloga kopianong ya thapelo, go bona tšhila ye bjalo ka yeo, gomme re ipitša Bakriste renabeng?

<sup>69</sup> Ka gona ge Modimo a tšollela Moya wa Gagwe fase, le go laetša maswao a tsogo ya Gagwe, re a O ahlola le go retologa go tloga. Gomme seo ke sebe sa go se labalelwé, go dira seo. Jesu o rile, “Go bolela lentšu le tee kgahlanong le Wona, go ka se tsoge go lebaletšwe, ka go lefase le goba lefase le le tlago.” Kafao Moya wola o swanetše go tla ka go matšatši a a mafelelelo, go netefatša Lentšu lela la Modimo go ba therešo.

<sup>70</sup> Gomme ke re, ka fase ga maatlataolo a Lantšu la Modimo, le maikutlo a soulo ya ka mong: Moya wo Mokgethwa (Moya) wo wa go swana o thwi mo bjale ka magareng ga batho ba. Bjale, ke tleleima gore O tsogile go tšwa bahung. Ke tleleima O a phela, o phela go ya go ile. Ke a tleleima O a swana maabane, lehono, le go ya go ile; go swana ka kokwane, go swana ka Maatla; go swana ka se sengwe le se sengwe, tšohle eupša mmele wa nama wa Gagwe wo o dutšego ka seatleng se setona sa Modimo le Borena, ka Letagong. Eupša Moya wo Mokgethwa o mo, o šoma, o sepela, go diragatša, go dira tlwa boka Jesu Kriste a dirile, gobane ke netefatšo ya tsogo ya Gagwe. A iri ye botse! Bjale ke a thanka le bona mo ke emego.

<sup>71</sup> Bjale, e sego feela le ba bannyane ba, e ka bago batho ba lekgolo, goba makgolopedi a batho mo ka go—ka go moago wo monnyane wo, ba pitlaganego ka mo bošegong bjo, eupša ke dirile setatamente seo pele ga dikete atiša ka dikete, le makgolo a dikete. Ke swere Beibele ka go seatla se tee, le Korana ka go se sengwe, ka re, “e tee e a rereša, gomme ye nngwe e phošo.” Gomme ka hlohla moprista yo mongwe le yo mongwe wa Mohammedan go tla go netefatša; goba e ka ba ofe yo mongwe, Buddha, goba eng kapa eng a ka bago, kgahlanong le Korana, le kgahlanong le bodumedi bja bona. Eupša yo mongwe le yo mongwe o homotše.

<sup>72</sup> Eupša, baena, lebaka ke dira seo, gobane ke a tseba Molopolodi wa ka o a phela! Gomme Yena ke Therešo. Jesu Kriste o a phela. O mo!

<sup>73</sup> Bjale ga se selo ka gare ga ka mong nka kgonago go se dira, ke mpho ya Modimo. “O e dira bjang?” E no ba go ineela wenamong.

<sup>74</sup> Thwi ka moagong wo bjale go ba bantši, Barongwa ba bantši. O re, “A ke Lengwalo?” Yeo ke Beibele. Anke ke le bontšhe. Ke Bakriste ba bakae ba lego mo, phagamiša seatla sa gago? Go lokile, le ka no di bea fase. Beibele e boletše gore, “Barongwa ba Modimo ba dikaneditše bao ba Mmoifago.” Kagona, go ne Barongwa mo!

<sup>75</sup> Kagona Kriste o rile, “Kae kapa kae ba babedi goba ba bararo ba kgobokanego ka Leina la Ka, Ke tla ba magareng ga bona.” Kagona, O mo! Selo se nnoši se lego, o ka se kgone go Mmona, eupša ka tumelo re a e dumela.

<sup>76</sup> Nka le netefaletša gore seyalemoya se kgabaganya mo, le sona, digalontšu. Nka le netefaletša gore diswantšho di tla go kgabola mo. Se ka se thule tšupu *ye* mo; se ka se thule godimo ga *ye*, legakabje le, godimo ga setšeamantšu se; ebile se ka se tle godimo ga seripa *se* sa setlabelo, gobane ga se sa dirwa ka tsela yeo. Eupša go ne seripa sa setlabelo se se tla tšweletšago seswantšho seo.

<sup>77</sup> Gomme Modimo o beile ba bangwe ka Kerekeng, ba pele baapostola, morago baprofeta, barutiši, baebangedi, le badiša, bohole bakeng sa go phethagatša Kereke. Re ka kgona bjang go gana yo motee, wa re yo mongwe ga a bjalo? Modimo o a e dira, Yenamong. Ga se selo lefaseng eupša go no ineela wenamong go Moya wo Mokgethwa. Gomme Moya wo Mokgethwa o tsea taolo go tloga fao, gomme ga o tsebe se o se dirago. Ke mošomo wa boikemo wa Moya wo Mokgethwa.

<sup>78</sup> Bjale, bagwera, toropo gae ya ka. Gomme ke nyaka go bolela se bjale, pele ga go tswalela tsošeletšo ye. Le lengwe la matšatši a go ka se be ebile le molora wo o šetšego ka Jeffersonille, go ka se be le o tee o šetšego ka Charlestown, go ka se be le o tee o šetšego ka Louisville. Lefase le le botšwitše bakeng sa kahlolo. Ba na le pomo ya haeterotšene bjale yeo Russia e ka kgonago go e thuntšha go tšwa Moscow, ya e ušetša ka Fourth Street, le go tsea se sengwe le se sengwe sa dimela tše tša puere tikologong mo, le go se nweletša dikgato tše masomešupa tlhano ka fase ga mobu, ka pomo e tee. Pomo e tee; disekwere maele tše lesometlhano, e tla ya dikgato tše lekgolo le masometlhano ka mobung. Seatla se godimo ga seragodi. Sešupanako se a rethetha. Go thari go feta ka mo re naganago. Gobaneng le leta go fihla nako yeo?

<sup>79</sup> Elelwang, “Tabarenekele ye ya lefase ge e phušoga, re na le ye nngwe e šetše e letile.” Le se ke la tšhošwa ke dipomo tša haeterotšene goba selo se sengwe. Ge feela o na le Kriste ka pelong ya gago, seo ke sešireletšo sa pomo se sekaonekaone ke se tsebago. Se dirilwe ka mafofa; ka fase ga diphego tša Gagwe, tše o dulago ka go tšona. Kafao o se tshwenyege ka dilo tše, ge o le Mokriste.

<sup>80</sup> Eupša ge o se Mokriste, ka nnete o eme ka lefelong la go befa. Ga o tsebe motsotso wo pelo ya gago e yago go kgaotša

go rethetha. Beibele e rile banna ba tla hwa ka matšatšing a mafelelo, ka bothata bja pelo, "Pelo tša banna di palelwa, ka letšhogo, dinako tše thata, tlalelo gare ga ditšhaba." Lebelelang ke eng bontši, monna makga a lesome bontši ba a hwa, go feta basadi; Beibele ga se ya ke ya re pelo ya basadi e tla palelwa, E rile, "Pelo ya banna e tla palelwa." Ao ke magomo, go phethagala.

<sup>81</sup> Letšatši le lengwe ka Oakland, mosadimogatša le nna re be re le godimo kua ka San Francisco, tšišinyego ya lefase ye kgolo yela e šikintše. Gomme lefase la thoma go kgeba le thaabe kua, go fihla meago e rekareka, gomme ditšhemene di ewa. Dipolo tše kgolo tša moyo di ile godimo ka mokgwa *woo*, le muši ka go yona, goba mokubego, e ka ba eng e bilego, go tšwa mafelong ao. Gomme batho ba kitmetše mekgotheng, ba goeleta. Ke naganne, "Go tla ba eng ge Morena ka kgonthe a tšwelela?" Mafelo a dinotagi, thwi go ya pele, ba bea dinotagi tša bona, morago dišelefong, le go bo rekiša. Batho ba tla ka gare go bo reka. Motho a ka se kgone go bo rekiša ge go se yo a bo rekago. Yeo ke nnete.

<sup>82</sup> Ke, ke rena ba molato. Anke ke go botše, ngwaneshu. Ke nna Moamerika, gomme ke rata naga ya gešu. Eupša setšhaba se sa kgale se kadilwe godimo ga sekala, gomme se hweditšwe se hlaelelwa. O a nwelela, ka nnete bjalo ka ge ke le modiredi ka morago ga sefala se bosegong bjo. Bjale ke bolela seo go hwetša mogau go Modimo. Ke se bolela ka gobane Modimo o se bea pelong ya ka go se bolela. Gomme selo se sekaoonekaone go wena go se dira ke go ba komana bakeng sa go Tla ga Morena.

<sup>83</sup> Bjale Mo dumele, eba le tumelo ka go Yena. Bjale, mantšu ohle nka kgonago go a bolela, ke bolela gape, a ka se re selo setee go se Jesu a ka se bolelago. Eupša a le lemoga mo ke emego, le sehlopha se sa batho bosegong bjo? E ba gore ga ka tsenatsena gare, ke hlathollotše ka phošo selo se sengwe, goba ke boletše Therešo. Bjale ge Jesu Kriste a tsogile go tšwa bahung, gomme, a tshepišitše, dilo tša go swana A di dirilego re tla di dira le rena. Gomme ke tteleimile, go tšwa go lesea le lennyane la mošemane . . .

<sup>84</sup> Ke be ke se dikgwedi tše lesomeseswai bogolo, ke a thankā, eupša e sego ka godimo ga mengwaga ye mebedi, go le bjalo, ge ke bone pono ya ka ya mathomo. E, bile, bophelo bjohle bja ka. Batho mo tabarenekeleng, ba tseba seo. Ge feelsa ke be ke le mo, ga go nako e tee e kilego ya palelwa. Gomme e ka se tsoge ya palelwa, gobane ke Modimo. E ile go dikologa lefase, tsošeletšo ye kgolo ya gotela. Gomme bjale, ka mogau wa Modimo, ke ka go milione wa ka wa bobedi wa disoulo, thwi ka kopanong ya ka mong, go thopela Morena Jesu. Milione wa bobedi, yeo ke nnete. Gomme ke no nagana ka dimilione tše dingwe tše di ilego ntle, Oral Roberts, tšohle tše dingwe ditlhase tše di goteditšwego go tšwa go selo, le go ya pele, dikete atiša ka dikete, go fihla go dikologa lefase go na le tsošeletšo e tee ye kgolo ya Maatla

a Modimo, e a sepela. Gomme diabolo o tlemolla mehuta yohle ya dilo tša maaka, go lwa le Yona. Eupša la kgonthe, Lentšu la therešo la Modimo le tla ya go otlonga go fihla bofelong. Le ka se tsoge la šitwa! “Nna Morena ke le bjetše. Ke tla le nošetša mosegare le bošego, ga go yo a ka le utlago go tšwa seatleng sa Ka.”

<sup>85</sup> Bjale, bošegong bjo, ke tleleimile gore Kriste o tsogile go tšwa bahung. O a swana maabane, lehono, le go ya go ile. Bjale, Morena a le šegofatše. Ge A tla dira seo, gona le... Ge le e dumela, Modimo a le šegofatše. Mo kgopeleng, nako yeo, ge A etla tiragalong. Ge Kriste a ka tšwelela mo sefaleng se! Thohlo še. Ge Jesu Kriste, Morwa wa Modimo, a ka tšwelela thwi mo sefaleng, le go dira dilo tša go swana tše A di dirilego ge A be a le mo lefaseng, a le tla Mo dumela? [Phuthego e re, “Amene.”—Mor.]

<sup>86</sup> Lebelela go Yena, mo tseleng go ya Emause, ka fao bona bašemane, ba be ba nyamile... Ge A ngwathile borotho bjola, O dirile se sengwe fao go bego go se yo a ka kgonago go se dira. E be e le se sengwe se Kriste a nnoši a bego a kgonago go se dira. Gomme ba se lemogile.

<sup>87</sup> Bjale ge A tla dira selo sa go swana mo, seo Kriste a nnoši a ka kgonago go se dira; e sego selo se sengwe sa maaka, eupša sona selo sa go swana A se dirilego; gona le Mo dumele, le Mo amogetše, le be le tumelo ka go Yena, le Mo rate, le Mo direle.

<sup>88</sup> Anke ke go botše, se no tšoena kereke bjale. Seo se ka se šome. O swanetše go tswalwa gape. E sego maitirišo a maikutlo; e sego se sengwe se sennyane o se boletše, “Gabotse, ke goeleditše. Ke boletše ka maleme. Ke dirile *se, seo, goba se sengwe.*” Ge ka kgonthe tlase ka pelong ya gago, Sengwe se tla go go fetola, gomme o ba sebopiwa se seswa ka go Kriste Jesu; o amogetše Motho, Kriste Jesu; ge dilo tša kgale di ehwa, gomme dilo tše mpsha di tswalwa gape; o dira dilo gabotse, tše o di dirilego ka phošo; o rata manaba a gago, o rapelela bao ba go šomišago ka lenyatšo; moo ke ge o le Mokriste. Mohlare o tsebja ka kenywa ye o e enywago.

<sup>89</sup> Anke Morena a le šegofatše bjale, ge re inamiša dihlogo tša rena. Ke ya go kgopela kgaetsedi go ya go piano, ka go nokologa a raloke “*Matwetwe yo mogolo bjale o kgauswi, Jesu wa kwelobohloko.*” Gomme lena ka ntle, bjale, ba le nago dikarata tša thapelo, batamelang kgauswi le mojako, re tla thoma mo nakwaneng. A re rapeleng.

<sup>90</sup> Wa rena Mošegofatšwa Tate wa Magodimong. Oo, segalontšu sa ka sa go šokiša, dikgwedi tše nne tša go bolela, ke nno lapa kudu ka go segalontšu sa ka. Eupša ke a rapela gore O tla nthuša gonabjale. Mo e tla ba monabo wo mongwe ka Tabarenekeleng ya Branham. Mo go tla ba hlatse ye nngwe e tsoga ka matšatšing a mafelelo, ka Letšatši la Kahlolo. Ba bantši ba eme ka gare le

ka ntle, bošegong bjo, ba bantši ba bona ba a makala, ba bantši ba a nagana, "A ke therešo, goba a ga se therešo?"

<sup>91</sup> O wa Gosafelego le Tate Mošegofatšwa, re a rapela gore bjale O tla bonagatša lerato la Gago go rena, ka go tšwelela mo le go dira Lentšu la Gago therešo. Ke boletše ka Lentšu la Gago; boka O dirile, Wenamong, go Kleopa le mogwera wa gagwe, go ya Emause. Gomme mo tseleng ya rena, Morena, bjalo ka ge re swere leeto, O bolela le rena ka Lentšu la Gago. Gomme bjale etla magareng ga rena! O Kriste yo Mogolo, etla magareng ga rena, netefatša Mantšu a Gago go ba therešo, gomme bonagatša Bowena bja Gago mo bošegong bjo. Ge, rena dibopiwa tša go šokiša tša go hloka maswanedi re ipolela gore re badiradibe gomme ga re swanelwe ke dilo tše, eupša re a le dumela, Morena. Gomme ka mogau re a le amogela, ka tumelo, gore re phološitšwe, gomme bana ba Gago. Re šegofetše bjale, Morena.

<sup>92</sup> Ke a tseba Lentšu la Gago ke therešo, ge O boletše ka "moprofeta ka toropongkogo ya gagwe mong, magareng ga batho ba gagwe mong." Eupša, Morena, ke a rapela, feela bakeng sa bošego bjo, gore O tla no lebelela fase go batho, le go iponagatša Wenamong gatee gape mo ka go toropokgolo ye, ka go sepela ga Moya wo Mokgethwa. O Modimo wa Gosafelego, re šegofatše bjale ge re letetše Wena. Gomme dira dilo tše O di dirilego pele ga papolo ya Gago, gomme Jeffersonville e tla ba ntle le selo se tee go belaela. Eupša, re a tseba gore ba tla hloka maitshwarelelo ka Letšatši lela, gore O iponagaditše Wenamong. Ka go la Jesu Leina, ke a rapela. Amene.

<sup>93</sup> [Lefelo la go se be le selo godimo ga theipi—Mor.] . . . e sego se a nyakago ke se rapelela. Aowa, ga se kankere, gobane o fodišitšwe yeo. Eupša o nyaka ke rapelela bothata bja mokokotlo bjo a nago le bjona. Yeo ke nnete. Ke bothata ka mokokotlong wa gagwe. A ke nnete? Bjale a o a dumela O tsogile go tšwa bahung? Bjale šetšang. Ge ke bolela le yena boteletša feela gannyane, mohlomongwe se sengwe gape se tla bolelwa. Ga ke tsebe. Bjale, ke be ke se ne kgopoloy a se bothata bja gago bo lego. Ga ke tsebe bjale e be e le eng. Le a bona? Eupša bagatiši ba bo hweditše, o ka kgona go hwetša se A se boletšego.

<sup>94</sup> A re bolele motsotsa feela boteletšana, gomme re bone ge A ka mpotša se sengwe gape. Ke bona mosadi yo a lebegago se sengwe ka mokgwa . . . Ke mosadi yo mongwe, gomme o a mo rapelela. Gomme o ka go mohuta tsoko wa lefelo goba bookelo, ke mohuta wa . . . Ke lefelo la monagano. [Kgaetšedi o re, "Ee."—Mor.] Ke Madison, Indiana. ["Yeo ke nnete."] Ke—ke kga—ke kga—ka kgaetšedi yo o nyakago a rapelelwa, yo a lego ka lefelong. Gomme ge o ka dumela ka pelo ya gago yohle, le tšohle tše di lego ka go wena, Modimo o tla lokolla gomme o tla fodiša mokokotlo wa gago le go go fodiša. O a e dumela bjale? Go lokile, etla mo.

<sup>95</sup> Morategi Tate wa Magodimong, re rapela gore ka go la Jesu Kriste Leina, gore O tla fodiša mosadi, le go mo dira a fole. Gomme efa tšhegofatšo ye go yena. Gomme ke a rapela gore dikgaogelo tša Modimo di tla khutša godimo ga gagwe, gomme o tla mo fodiša, gomme wa hwetša letago go Wenamong. Ke a rapela ka go la Jesu Kriste Leina. Amene.

<sup>96</sup> Nka no bolela se. Go na le mororomelo go tšwa kua, go tšwa thwi morago *mo*. Nakwana feela, ema fao motsotso feela. Ke lemogile Seetša sela se go tlogetše. Go na le ba bantši kudu, lešaba le lentši kudu go ntikologa mo. Yo mongwe le yo mongwe o a goga. Eupša ke Se bona se šuthela go wena. Ke yo mongwe yo . . . O na le—na le karo ya sesadi e tla godimo. Yeo ke nnete. Ke bone batho ba babedi goba ba bararo ba tšwelela, gomme Seetša se arogetše thwi morago kua le go itia motho yola a emego thwi morago kua. Ke bona ba rapelelago yeo. Le a bona? Yeo ke nnete. Gomme o na le, ke seemo sa mohumagadi yo a nago le karo ya sesadi. Yeo ke nnete. Bjale eya gomme o amogele pholo ya gago, gomme Morena Modimo o go fodištše. Amene.

<sup>97</sup> A o ka tla? Mohumagadi, a o dumela go Morena Jesu? [Kgaetšedi o re, “Ee, mohlomphegi.”—Mor.] A o a dumela gore O tsogile go tšwa bahung? Bjale, go go tseba, ga ke dire. Nka no ba ke go bone ge o etšwa tikologong mo. Ga ke tsebe. Batho ba a tla le go tloga, ga ke tikologong ya tabarenekele mo go lekanela go tseba. Eupša, wena, a o tšwa toropongkgolo? [“Ee.”] O tšwa toropongkgolo. Go lokile, gona, eupša ga ke go tsebe. Eupša Kriste o a go tseba. Eupša ge A ka utolla go nna, ke eme mo, se o logo mo bakeng sa sona, a o tla e dumela le go e amogela? Gomme o a tseba ga ke tsebe se o logo mo bakeng sa sona, ga ke ne kgopolو. Selo se nnoši, o ka no ba o mpone tikologong ya toropo goba se sengwe, goba, goba se sengwe. Ga ke tsebe. Go tšwa go Modimo go—go tseba seo.

<sup>98</sup> Moragorago kua, o nyaka go ba ka godimo ga bothata bjoo bja mala o bego o na le bjona? A o a dumela Morena Jesu o tla go fodiša? Ge o e dumela, o ka kgona go ba le yona.

<sup>99</sup> Yo mongwe o na le palo ye mpe ya madi, o dutše morago kua, ke ba bone ba tšea. A o a dumela gore Morena o tla go fodiša? Go lokile. A o a dumela ka pelo yohle ya gago? Gona o ka ba le phodišo ya gago, Modimo o sa tšo go fodiša. O Mo kgwathile. Ga se wa tsoge wa kgwatha nna, o dikgato tše masometharo go tloga go nna. Amene.

<sup>100</sup> Bjale a o a dumela O tsogile go tšwa bahung? E no lebelela, gomme o phele, bjale ge mothalo o sepela. Oo, go bothata kudu mo ka Jeffersonville! Le a bona? Gomme lešaba boka le go go dikologa, yo mongwe le yo mongwe! Jesu o tšere monna ka seatla, gomme a mo ntšhetša ka ntle ga toropo, nako ye nngwe.

<sup>101</sup> Bjale lebelela ka tsela ye, kgaetšedi, nakwana feela. Dumela gore Morena Jesu o gona go go thuša. O sotlega ka bothata bja

bjo bo lego ka go lela, gomme ngaka e go hlahlobile. [Kgaetšedi o re, "Ee."—Mor.] Gomme o go boditše e be e le "diphaele." Ke go bona gape o leka go sepela go kgabaganya ntlo, gomme o ya ka go neneka ka kgonthe. O na le athiraithese. ["Yeo ke nnete."] Yeo ke GO RIALO MORENA. Ngaka o rile o swanetše go dirwa karo ya yona. Yeo ke nnete tlwa. Gomme ke mmona a saena karata ye nnyane yela ka ofising ya gagwe: Rebekah Baker. ["Ee, mohlomphegi."] 509 Graham Street. ["Yeo ke nnete."] Yeo ke nnete tlwa. Yeo e ka ofising ya gagwe, mo rekotong. Yeo ke nnete. A o a dumela? ["Ee, mohlomphegi."] Gona o ka kgona go ba le phodišo ya gago. Ka go, Leina la Morena Jesu Kriste, anke mosadi yo a amogele phodišo ya gagwe. Amene. Modimo a go šegofatše, mohumagadi. Sepela, o dumela bjale. Eba le tumelo ka go Modimo.

Ge o ka no lemoga Bogona bja Morena!

<sup>102</sup> Bjale mohumagadi a emego mo, ge o ka...ga ke go tsebe, bokgole bjo ke tsebago. Ga o ntsebe, gomme ga ke go tsebe. A ke nnete? Ka moka gabotse. Kagona o yo mongwe yo a sa ntsebego, gomme ga ke ba tsebe. Gomme ga se ke tsebe mohumagadi yo mongwe. Eupša mohumagadi yo ke mosetsebje wa go phethagala, bokgole bjo ke tsebago. Ge seo e le therešo, emišetša seatla sa gago godimo, mohumagadi. Nako ya mathomo ya rena, re kilego ra kopana bophelong.

<sup>103</sup> Šo mosadi le monna. E no ba seswantšho se sebotse sa Mokgethwa Johane 4, moo mosadi le Monna ba kopanego; gomme mosadi e be e le Mosamaria, Jesu e be e le Mojuda. Gomme ba thoma go boledišana seng sa bona, gomme Jesu o utollotše diphiri tša pelo ya gagwe le go mo tsebiša moo bothata bja gagwe bo bego bo le gona. Bjale, ge A le Jesu wa go swana lehono, A ka kgona go dira modiro wa go swana lehono.

<sup>104</sup> Ge mosadi yo a ka phagamišetša seatla sa gagwe go Modimo, e sego go ena (gobane, ga re dumele go go e dira), go no phagamišetša seatla sa gagwe godimo ka tlhokofalo, le sa ka, gore ga se ra ke ra tsoge ra bonana seng pele, gomme ga re tsebe selo ka rena seng. A o ka phagamišetša seatla sa gago godimo, mohumagadi? Ke lena bao. Ga se a ke a tsoge a mpona, goba ga se kake ka tsoge ka mmona, gomme ke mosetsbje go felela go nna. Bjale ge go le...

<sup>105</sup> Bogona bja Morena Jesu bo mo. Ge mosadi a babja, nka se kgone go mo fodiša. O šetše a fodišitše; Kriste o mo fodišitše ge A mo hwetše. A le dumela seo? Eupša ge A ka be a eme mo bjale, gomme—gomme mo ke emego, gomme O be a ka, kgona go utolla go yena, goba go dira se sengwe go tliša tumelo ya gagwe godimo go kopana! Bjale, a ka no ba a eme mo bakeng sa bothata bja tšhelete. A ka no ba a eme mo ka go mathata a selegae. A ka no ba a eme mo, a ehwa ka kankere. A ka no ba a eme mo ka TB. Ga ke tsebe. Nka se kgone go le botša.

<sup>106</sup> Gomme bjale ge o nyaka go ipea wenamong ka go lefelo la ka, etla mo gomme o tsee lefelo la ka. O amogelegile. [Ngwanešu Branham o a khutša—Mor.] Nnete. Le nna ga ke tsebe, le bile nka se e dire. Eupša Modimo wa Legodimong o a tseba. Le kgona go kwešiša bjale? [Phuthego e re, “Amene.”]

<sup>107</sup> Gomme ge Kriste a ka dira selo sa go swana mo, Therešo ya go se palelwe, boka ge A tsogile go tšwa bahung, le go netefatša gore ke Yena Jesu wa go swana yo a boletšego le mosadi mo sedibeng, ke ba bakae ka mo ba rego, “Ke tla Mo amogela thwi bjale bjalo ka Mofodiši, goba e ka ba eng ke se hlokago”? Phagamiša seatla sa gago, e re, “Ke tla Mo amogela ge A ka dira seo.”

<sup>108</sup> Mosadi ka diatla tša gagwe godimo, ga se nke ra tsoge ra kopana. Morena e fe, ke thapelo ya ka. Bjale mohumagadi o bonala a šutha go tloga go nna; ge batheeletši ba ka kgona go topa segalontšu sa ka. Ke bona yo mongwe o eme. Ga se sebakeng sa gagwemong, bontši kudu. O rapelela yo mongwe gape, gomme yoo ke mohumagadi mogolo. Ke mmagwe, a mo rapelelagoo. Yeo ke therešo. O na le ditlhaseloo tše nnyane tša pelo, diphafatlo tše nnyane tša pelo, boka. Ga a kgone go robala bošego. A yeo ga se nnete? Phagamiša seatla sa gago ge yeo e le therešo. Gomme mohumagadi yoo ga a tšwe mo nageng ye. Mohumagadi yoo o tšwa kgole go tloga mo. Mohumagadi yoo o tšwa Georgia. Yeo ke nnete tlwa. Gomme o tšwa Georgia. Gomme o nyaka thapelo bakeng sa leihlo la gago, le wena. O a fousala ka mahlong a gago. Gomme yeo ke therešo. A o dumela Modimo o tla go fodiša? Ge yeo e le therešo, phagamišetša seatla sa gago godimo. Go lokile.

<sup>109</sup> Bjale a le a dumela? [Phuthego e re, “Amene.”—Mor.] Bjale eba le tumelo go Modimo. Ge ke sa mo rapelela, ithapelele wenamong ntle fao, gomme dumela Modimo. Yena o mo, motlalagohle.

Etla mo, kgaetšedi.

<sup>110</sup> Mošegofatšwa Mophološi, ke a rapela gore, ka go la Kriste Leina, gore O tla fa go mosadi yo tlhologelo ya gagwe. Anke Maatla a Ramaatlakamoka Modimo a khutše godimo ga gagwe, gomme anke a fodišwe le go hwetša e ka ba eng a e kgopetšego. Ke rapelela tšhegofatšo ye ka go la Jesu Leina. Amene.

<sup>111</sup> Bjale sepela, o thakgetše, le go thaba. Gomme dumela, kgaetšedi, gomme o fodišwe. Go lokile.

<sup>112</sup> Ga e na le nnete, eupša ke a dumela ke tseba mosadi yo. Ke a dumela o tšwa Georgetown, gobane ke nna . . . A ga o leloko la Ngwanešu Arganbright? Nnete, bjale tlotšo ye, e a fapano. Le a lemoga gore go ne phapano gonabjale. Ge ke bolela le wena felotsoko gape; go a fapano gonabjale. O ikwetše maikutlo a mabosana ka kgonthe, boka. Ke Moya wo Mokgethwa. Ga o mo bakeng sa gagomong. O mo bakeng sa yo mongwe gape, gomme yoo ke mosetsana yo monnyane a ka ba ye mene goba ye mehlano

mengwaga bogolo. O na le bothata bja pshio, gomme o dula leboa la Indiana. Yeo ke therešo. Seo o nago le sona ka seatleng sa gago, se romele yena, gomme o tla fola. Dumela ka pelo yohle ya gago bjale, gomme o amogele se o se kgopetšego, ka go la Kriste Leina.

“Ge o ka dumela, dilo tšohle di a kgonega!”

<sup>113</sup> Mohumagadi šo yo e lego mosetsebje go nna. Ga ke go tsebe, ga se nke ka tsoge ka go bona bophelong bja ka. Re basetsebane seng sa rena, mengwaga ye mentši go arogana; mohlomongwe tše dintši, re tswetšwe dimaele tše dintši go arogana. Ga ke go tsebe, ga se nke ka tsoge ka go bona. Eupša Jesu Kriste o a go tseba.

<sup>114</sup> Se sengwe se diregile ka go batheeletši; monna o tšweletše go nna. Šo o dutše, thwi mo, mokhubu wa go phatloga. A o a dumela, mohlomphegi? [Ngwanešu o re, “Ee!”—Mor.] Gona Kriste o a go fodiša le go go dira o fole! Amene.

<sup>115</sup> Yeo ke tsela ya go e dira, dumela! O kgwathile eng? Ga se nke ka tsoge ka bona monna; eupša o fodišitšwe thwi fao. O kgwathile Morena Jesu Yo a lego mo. Tloša gosedumele goo go tloga go wena! Lebala ka nna ke lego William Branham. Lebelela Jesu Kriste, ke Yena Yo a lego mo. Ke hlohla tumelo ya gago, ka go la Kriste Leina, go lebala ka nna; gomme o dumele gore yo ke Morena Jesu mo, gomme o bone se se tla diregago. Ga ke tshwenyege mo o lego ka moagong.

<sup>116</sup> Bjale mosadi yo monnyane šo. Ga se nke ka tsoge ka mmona. Ke yo mogologolo go mpheta. Yena, ga ke mo tsebe gore ke mang, o tšwa kae, e sego selo ka yena. Ke nna mosetsebje wa go phethagala go yena. Eupša Kriste o a mo tseba.

<sup>117</sup> Ge A ka utolla go nna se o lego mo ka sona, a o tla e amogela le go e dumela? [Kgaetsedi o re, “Nnete.”—Mor.] O bile le maikutlo a go se tlwaelege metsotso e se mekae ya go feta, ge ke boletsé se sengwe, a ga se wa ke? E be e le sammago [“Ee.”] yo a lego ka lefelong la mahlanya ka Madison, Indiana. [“Yeo ke nnete.”] Yeo ke nepagalo. Ka gobane, mosadi yo mongwe o be a eme mo, gomme o be o eme kua o lebeletše godimo ka tsela ye. Gomme pono, o be o dumela ge o be o etla godimo. [“Nnete.”] Yeo ke nnete tlwa. Seo ke se e dirilego. Gomme lebaka le o lego mo bošegong bjo, ke ka gobane o na le bothata bja pelo. O sa tšo ba le tlhaselo ya pelo. Yeo ke nnete tlwa. [“Yeo ke nnete.”] Gomme ke a bona bjale, ge ke lebelela ka ponong, naga yela ya go tatologa. O tšwa felotsoko mo ka borwa bja Indiana. O tšwa kgauswi le Corydon, ke mo o tšwago gona. Eya morago gae, o fodile. Jesu Kriste o a go fodiša. Seo ke GO RIALO MOYA WO MOKGETHWA.

<sup>118</sup> Ebang le tumelo, gomme o dumele. O se ke wa belaele. E no dumela feela. A o ka kgona go lemoga botlalagohle bja Morena Jesu? Go makatša bjang! Bothata ke eng?

<sup>119</sup> Godimo mo ka khoneng, ke bona pono. Ngaka ga a tsebe ge eba ke kankere goba TB. [Motho o re, “Yeo ke nepagalo.”—Mor.]

Yeo ke nnete. Eupša ge o ka e dumela, o fodišitšwe, go le bjalo. Tumelo ya gago e go phološitše. Eya pele.

<sup>120</sup> Ke lena bao. Botlagohle bja Modimo wa go phela! Ke hlohlala tumelo ya gago. “Ge o ka kgona go dumela!” Bjale, O tsogile go tšwa bahung. Yena o mo le rena. Ke Yena yoo! Tšeou ke tšona dilo A di dirilego ge A be a le mo lefaseng. Mengwaga ye dikete tše pedi e fetile, O sa ntše a phela, gomme O phela go ya go ile. E no dumela, eba le tumelo.

<sup>121</sup> Ga ke go tsebe, mohumagadi. Ga se nke ka tsoge ka go bona ka bophelong bja ka, ga ke tsebe selo ka wena. Yeo ke therešo, a ga se yona? Jesu Kriste o a go tseba. Ge Modimo a ka utolla go nna se o lego mo bakeng sa sona, a o tla Mo dumela, le go dumela nna go ba moprofeta wa Gagwe? Ge A ka dira seo, o a tseba Sengwe se ntloditše. O tla tseba ke Yoo. Bjale ge ke rile, “Ke ya go bea diatla tša ka godimo ga gago, o fodišwe,” o tla ba le tokelo go belaela seo. Eupša ge Modimo a mpotša se sengwe se o se tsebago go ba therešo, gona o a tseba ge eba yeo ke therešo goba aowa. A ke nnete? [Kgaetšedi o re, “Yeo ke therešo.”—Mor.] Ke go hlakahlakana ga sesadi. O karilwe, ke go bona o etšwa tafoleng ya karo, ka se sengwe se sesweu godimo ga sefahlego sa gago, eupša ga se ya atlega. Yeo ke nnete. Eupša, diabolo yola o utagetše go ngaka, eupša a ka se kgone go utagala go Modimo. Eya gae, gomme o fole, mohumagadi, Jesu Kriste o go fodišitše le go go dira o fole.

Ge o ka kgona go dumela!

<sup>122</sup> Ke nna mosetsebje go wena, mohumagadi. A o dumela Jesu Kriste, Morwa wa Modimo, o mo? A o a dumela gore O tla go dira o loke? Bolwetši bja swikiri ga se selo, go Modimo go fodiša. A o a dumela gore O tla go fodiša? Gomme eya gae gomme o amogele phodišo ya gago, ka Leina la Jesu Kriste, Morwa wa Modimo. Amene.

Etla mo, mohumagadi. A o a dumela?

<sup>123</sup> Bjale emiša go nagana seo morago kua! Ga se “go bala monagano.” O ka se tlodge ka yona bjale! Anke ke le bontšhe.

<sup>124</sup> Ga ke tsebe mosadi yo. Bea diatla tša gago godimo ga tša ka, mohumagadi. Ge Modimo a ka utolla go nna se bothata bja gago e lego! Nna ke lebeletše tsela *ye*, o a tseba ga ke bale monagano wa gago. Ge Modimo a ka utolla go nna se bothata bja gago bo lego, a o tla dumela Jesu Kriste ke Morwa wa Modimo, gomme nna go ba mohlanka wa Gagwe? Ge o tla dira, phagamišetša seatla sa gago godimo. O na le bothata bja sesadi, bothata bja bahumagadi. Yeo ke nnete. O bile; ga o nabjo bjale. O fodišitšwe. Eya ka tsela ya gago, gomme thakgala gomme o hlalale.

<sup>125</sup> Etla, mohlomphegi. Bothata bjola bja kgale bja pshio, gomme se sengwe se a go tshwenya. A o a dumela Modimo o tla go fodiša? [Ngwanešu o re, “Ee.”—Mor.] A go fodiša yona? Gona, ka Leina la Jesu Kriste, amogela phodišo ya gago, gomme o ye

ka tsela ya gago, o thakgetše. Amene. Modimo a go šegofatše, ngwanešu.

Dumela!

<sup>126</sup> O dira bjang, mohumagadi? A o ka se rate go ya, o je dijo tše botse gape boka o be o dira? O be o tšhogile gohle, a o be o se wa? Ka baka la alesa ya mogodu go ba ka mogodung wa gago. Eya, o hwetše hampeka ya gago gomme o eje, Jesu Kriste o go fodišitše. Eya ka tsela ya gago, o thakgetše.

<sup>127</sup> “Ge o ka kgona go dumela!” Eba le tumelo ka go Modimo. A le a dumela? [Phuthego e re, “Amene.”—Mor.] Wa go phela, Kriste mokgonatšohle o gona mo bjale, go fodiša motho yo mongwe le yo mongwe mo.

<sup>128</sup> Nakwana feela. Moragorago go theoga mothalo, go dutše fase thwi mo, go dutše lesogana. Tumelo ya gago ke ye kgolokgolo go feta ka mo o naganago o nayo, morwa. O bile le bothata bja pelo, a ga se wa ke? Ge yeo e le nnete, emeleta ka maoto a gago. Jesu Kriste o go fodišitše, morwa. O fodile. Eya ka tsela ya gago, gomme o fole.

<sup>129</sup> A le Mo dumela? [Phuthego e re, “Amene.”—Mor.] Ebang le tumelo ka go Modimo.

<sup>130</sup> Monna šo yo ke sa mo tsebego. Re basetsebane seng. Ke a dumela monna yo o kolobeditšwe mosong wo. Eupša ga ke go tsebe, ga ke ne lesedi ka wena. A ke nnete? Ge Jesu Kriste a ka utolla go nna se o lego mo ka sona, a o tla e amogela?

<sup>131</sup> Ke ba bakae ka batheeletšing ba tla e amogelago bjale? [Phuthego e re, “Amene.”—Mor.] “Ge o ka kgona go dumela!” E no ba le tumelo. O se ke wa belaela.

<sup>132</sup> Monna o ne bothata bja letlalo. Yeo ke nnete. Gomme ke a bona o hwetša . . . Ke bothata bja proseteite, gape. Yeo ke nnete. Ge e le yona, šišinya seatla sa gago. Gomme ke bona se sengwe se seso se eme gare ga gago le mosadi; ke mosadimogatša wa gago. O a mo rapelela. Ke modiradibe, gomme o mo nyaka a eba Mokriste. Seo ke GO RIALO MORENA. Yeo ke nnete. Sepela, bea diatla tša gago godimo ga gagwe, gomme o mo rapelele, gore Modimo Legodimong o tla utolla bohlokwa bja dilo tše tše di lego kgonthe.

<sup>133</sup> A o a dumela? A o a dumela gore Modimo o tla e dira? “Ge o ka kgona go dumela!” Ke hlohlala tumelo ya gago. Moragorago ka morago, kae kapa kae o lego, lebelela gomme o phele! Eba le tumelo ka go Modimo, kae kapa kae o lego. “Ge o ka kgona go dumela, dilo tšohle di a kgonega.” Ge o ka kgona go dumela! Šetša. Lebelela ka tsela ye. Rapela. [Ngwanesu Branham o a khutša—Mor.]

O re, “O šeditše eng, Ngwanešu Branham?”

<sup>134</sup> Rebekah, etla morago ka tsela ye gannyane, hani. Ema thwi moo o lego. Mosetsana wa ka yo monnyane šole, yo letšatši le

lengwe a tla bago moprorofetagadi, le yena. Mohumagadi yo a emego thwi fao hleng le wena, hani, a rwelego kefa ye tšhweu, o sotlega ka bothata bja disaenase. Phagamiša seatla sa gago, goba ema ka maoto a gago, mohumagadi. O a rapela gore Modimo o tla bitša, a ntira ke go bitše. A ke nnete? Anke mosetsana wa ka yo monnyane a bee diatla tša gagwe godimo ga gago moo. O Modimo wa Gosafelego, ka Leina la Jesu Kriste, ke kgalemela letimone lela le tshwenyago mosadi yola. Gomme anke le tlošwe, ka go la Kriste Leina. Amene.

<sup>135</sup> Oo, a go šegofatšwe Leina la Morena! Anke Morena Jesu a ikutolle Yenamong, le yena. A le a dumela O mo? [Phuthego e re, "Amene."—Mor.] Gona anke ke le botše, yo mongwe le yo mongwe wa lena, gonabjale, ge le ka kgonia go e dumela, Jesu Kriste o fodiša yo mongwe le yo mongwe, gonabjale. Ge mantšu a ka e le therešo *mo*, ke therešo *kua*. Ge le ka dira se ke le botšago go se dira, le ka kgonia go fodišwa gonabjale. A le a e dumela? [Phuthego e re, "Amene."] Gona beanang diatla godimo ga seng sa lena. E nong go bea diatla godimo ga seng sa lena, ka gare goba ka ntle. Le se ke la belaela! Ke kwa moyia bofowa o sepela. So Yena, Kriste yo a tsogilego!

<sup>136</sup> O wa Gosafelego le Mošegofatšwa Modimo, ka Leina la Morena Jesu, ke hlohla moyia wo mongwe le wo mongwe wa ditšhila, ka Leina la Kriste Morena, gore o tla tloga lefelong le, go ya ka ntle ga batho ba. Gomme anke Moya wo Mokgethwa wo mogolo bjale o kolobetše yo mongwe le yo mongwe ka mo, ka tumelo ye kgolo go dumela.

<sup>137</sup> Oo, Sathane, wena letimone, o re forile botelele go lekanelia. Kriste o tsogile, O eme mo ka dikgonyo tša lehu le hele di lekeletše go Yena. Maatla a phodiša lefetšwe. Gomme re a go leleka, ka Leina la Jesu Kriste, Morwa wa Modimo wa go phela, gore o tloga go batho ba. Tšwela ka ntle ga bona, Sathane, gore ba ye gomme ba fodišwe.

<sup>138</sup> Ge o dumela ka pelo yohle ya gago, gore Jesu Kriste o go fodišitše, ema ka maoto a gago, gomme o amogele Maatla Makgethwa a phodiša a Ramaatlakamoka Modimo. Yeo ke yona! Tumišang Morena! Šegofatšang Morena! Lena le, yo mongwe le yo mongwe, fodišitšwe. Emang ka maoto a lena, gomme le fe Modimo tumišo! Amene! A go šegofatšwe Leina la Morena! A re Mo feng tumišo, ge re phagamiša diatla tša rena le go Mo tumiša. Šegofatšang Morwa wa wa go phela Modimo! Amene!



*GOMME MAHLO A BONA A BULEGA GOMME BA MO TSEBA* NST57-0421E  
(And Their Eyes Were Opened And They Knew Him)

Molaetša wo ka Ngwanešu William Marrion Branham, setlogong o abilwe ka Seisimane ka Lamorena la Paseka mantšiboa, Aporele 21, 1957, mo Tabarenekeleng ya Branham ka Jeffersonville, Indiana, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2020 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tſweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditſhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)